

page :

M065

條目：

《無垢優婆夷問經》

內容：

《無垢優婆夷問經》(14) 瞿曇般若流支譯

掃佛塔地五福。作(塔)四塗地，燒香散華福，入禪歸戒福。——人、天，涅槃。

出處：

※參見《無垢優婆夷問經》卷 1 (CBETA, T14, no. 578, p. 950, c10-28)：

爾時，世尊即告無垢優婆夷言：「汝優婆夷！不放逸行、懈怠心不？」

優婆夷言：「我不懈怠，不放逸行。」

佛告無垢優婆夷言：「汝常云何不懈怠耶？又汝云何不放逸行？」

無垢優婆夷白佛言：「世尊！我常早起掃佛塔地，掃已塗治四廂四處，清淨塗已，散華燒香，如是供養，然後入房。既入房已，次復入禪，修四梵行，不離三歸，受持五戒，常恒如是。我不懈怠，不放逸行。」

無垢優婆夷作是語已，復白佛言：「世尊！我今未知掃佛塔地所有善根得何福報？四廂塗治，所有善根得何福報？散華燒香，供養佛塔，所有善根得何福報？禪四梵行，三歸五戒，所有善根得何福報？唯願世尊為我解說。」

佛告無垢優婆夷言：「掃佛塔地，得五福報。何等為五？一者、自心清淨，他人見已生清淨心；二者、為他所愛；三者、天心歡喜；四者、集端正業；五者、命終生於善道天中。無垢當知，掃佛塔地，福報如是。」

※參見《無垢優婆夷問經》卷 1 (CBETA, T14, no. 578, p. 950, c29-p. 951, b15)：

「無垢當知，若人信佛，作圓輪形，塗佛塔地，散花燒香。如是供養，我說彼人身壞命終，生弗婆提，富樂自在；於彼壽終，生化樂天。

「無垢當知，若人信佛，作半月形，塗佛塔地，散華燒香。如是供養，我說彼人身壞命終，生瞿陀尼，富樂自在；於彼壽終，生兜率天。

「無垢當知，若人信佛，於佛塔邊，四方塗地，散花燒香。如是供養，我說彼人身壞命終，生鬱單曰，富樂自在；於彼壽終，生炎摩天。

「無垢當知，若人信佛，作人面形，塗佛塔地，散華燒香。如是供養，我說彼人身壞

命終，生閻浮提，富樂自在；壽終生於三十三天。

「無垢當知，此塗塔地，散華燒香，所有善根，果報如是。

「無垢當知，若人入禪修四梵行，歸佛法僧，受持五戒，我說彼人無量無數，善根福報，無窮無盡，後得涅槃。

「無垢當知，若人歸依聲聞、緣覺，修集戒聚，不能如是無盡涅槃。何以故？受持五戒，禪四梵行，所得果報，唯除涅槃，更無處受，以福多故。」

世尊爾時如是說已，無垢優婆夷心生疑念，默而無言。

爾時，世尊知心念已，即從面門，出廣長舌，遍覆自面二耳、二眼、并二鼻已，遍覆虛空，覆虛空已，還攝入口，攝入口已，復語無垢優婆夷言：「汝頗曾見妄語之人，兩舌、惡口、綺語之人，有如是色舌相以不？」

爾時，無垢優婆夷既聞是語，從坐而起，合掌向佛白言：「世尊！未曾見也。有實語者，未有此舌，況妄語人。唯除如來、應、正遍知，無始已來，常實語故，得如是舌。」

爾時，無垢優婆夷，知佛實語，離疑心喜，以偈讚曰：

「我於千億劫，不曾憶念見，如是勝法寶，不憶曾供養；

我今日得見，如是世間燈，既如是見已，得聞第一法。」

爾時，世尊偈答無垢優婆夷曰：

「汝聞已成聖，此真勝法寶，清淨寂靜法，得入涅槃城。」

世尊說已，無垢優婆夷心大歡喜，比丘、比丘尼、優婆塞、優婆夷，一切眾會天、人、阿修羅、乾闥婆等，聞佛說已，讚言：「善哉！」

此經人天因，亦是涅槃道，行者向人天，亦趣涅槃門。

譯此經功德，普施諸眾生，願速修因道，得**人天涅槃**。」

條目：

《造塔功德經》

內容：

《佛說造塔功德經》(16) 地婆訶羅譯

為觀世音說。化身舍利，法身舍利。

出處：

※參見《佛說造塔功德經》卷 1 (CBETA, T16, no. 699, p. 801, a14-b17)：

如是我聞：一時佛在忉利天宮白玉座上，與大比丘大菩薩等，及彼天主無量眾俱。時大梵天王、那羅延天、大自在天及五乾闥婆王等，各與眷屬俱，來至佛所，欲問如來造塔之法，及塔所生功德之量。

會中有菩薩，名觀世音，知其意，即從座起，偏袒右肩，右膝著地，合掌向佛，而作是言：「世尊！今此諸天、乾闥婆等故來至此，欲請如來造塔之法，及塔所生功德之量。唯願世尊為彼解說，利益一切無量眾生！」

爾時世尊告觀世音菩薩言：「善男子！若此現在諸天眾等，及未來世一切眾生，隨所在方未有塔處，能於其中建立之者——其狀高妙出過三界，乃至至小如菴羅果；所有表刹上至梵天，乃至至小猶如針等；所有輪蓋覆彼大千，乃至至小猶如棗葉——於彼塔內藏掩如來所有舍利、髮、牙、髭、爪，下至一分；或置如來所有法藏十二部經，下至於一四句偈。其人功德如彼梵天，命終之後生於梵世。於彼壽盡，生五淨居，與彼諸天等無有異。善男子！如我所說如是之事，是彼塔量功德因緣，汝諸天等應當修學！」

爾時觀世音菩薩復白佛言：「世尊！如向所說，安置舍利及以法藏，我已受持。不審如來四句之義，唯願為我分別演說！」

爾時世尊說是偈言：

「諸法因緣生，我說是因緣，因緣盡故滅，我作如是說。」

「善男子！如是偈義名佛法身，汝當書寫置彼塔內。何以故？一切因緣及所生法，性空寂故，是故我說名為法身。若有眾生解了如是因緣之義，當知是人即為見佛。」

爾時觀世音菩薩及彼諸天一切大眾、乾闥婆等，聞佛所說，皆大歡喜，信受奉行。

條目：

《右繞佛塔功德經》

內容：

《右繞佛塔功德經》(16) 實叉難陀譯

佛為舍利弗說：出、出世間一切功德，皆由右邊塔。偈頌體

【按：「出、出世間」疑為「世、出世間」之筆誤。】

出處：

※參見《右繞佛塔功德經》卷 1 (CBETA, T16, no. 700, p. 801, b27-p. 802, b29)。

條目：

《溫室洗浴眾僧經》

內容：

《佛說溫室洗浴眾僧經》(16) 安世高譯

告耆域：澡浴眾僧，用七物，除七病，得七福。偈頌廣說得人天等功德。中有「菩薩大士」四字。

出處：

告耆域：澡浴眾僧，用七物，除七病，得七福。偈頌廣說得人天等功德。

※參見《佛說溫室洗浴眾僧經》卷 1 (CBETA, T16, no. 701, p. 802, c28-p. 803, c3)。

中有「菩薩大士」四字。

※參見《佛說溫室洗浴眾僧經》卷 1 (CBETA, T16, no. 701, p. 802, c20-28)：

「耆域長跪白佛言：『雖得生世，為人疎野，隨俗眾流，未曾為福。今欲請佛及諸眾僧、菩薩大士，入溫室澡浴。願令眾生長夜清淨，穢垢消除，不遭眾患。唯佛聖旨，不忽所願！』」

「佛告醫王：『善哉，妙意！治眾人病，皆蒙除愈，遠近慶賴，莫不歡喜。今復請佛及諸眾僧，入溫室洗浴，願及十方眾藥療病，洗浴除垢，其福無量。一心諦聽，吾當為汝先說澡浴眾僧反報之福！』」

條目：

《施燈功德經》

內容：

《佛說施燈功德經》 那連提耶舍譯

佛塔前施燈明也。

出處：

※參見《佛說施燈功德經》卷 1 (CBETA, T16, no. 702, p. 804, b4-11)：

「舍利弗！如是少時於佛塔廟奉施燈明，若彼比丘、比丘尼、沙彌、沙彌尼、優婆塞、優婆夷，若復餘人不受戒者，為樂善故，護己身故，信佛、法、僧，如是少燈奉施福田，所得果報福德之聚，唯佛能知。一切世間天、人、魔、梵、沙門、婆羅門，乃至聲聞、辟支佛等所不能知。如是然少燈明，所受福報不可得說。」

條目：

《阿難問事佛吉凶經》

內容：

《佛說阿難問事佛吉凶經》(14) 安世高譯？

結說是大乘。 七五一上部分，勘與法炬譯《慢法經》同本

出處：

※參見《佛說阿難問事佛吉凶經》卷 1(CBETA, T14, no. 492a, p. 754, b20-24)：

阿難稽首頌已，諸會大眾**得不迴還**，心意開解，**僧那大鎧志無上道**，甘露之音，香熏十方。示現道地為作橋梁，國王、臣民、天龍、鬼神，聞佛所說，阿難所頌，且悲、且感、且歎、且喜，稽首佛足，及禮阿難，受教而去。

條目：

《阿難四事經》

內容：

《佛說阿難四事經》(14) 支謙譯

1、「六度大法」，「十方諸佛，開士大人。」

2、一、慈心。二、救災恤貧。三、不殺不食肉，施醫藥。四、供食請傳道士。——大乘。

出處：

1、「六度大法」，「十方諸佛，開士大人。」

※參見《佛說阿難四事經》卷 1(CBETA, T14, no. 493, p. 756, c23-29)：

佛言：「善哉，善哉！阿難！慈心多愍天人雜類，無不由汝得度脫者。吾去之後，世名五濁，人心憤憤，穢垢自亂，世多顛倒，賤善尊惡，此實可憂。世雖然者，吾有經籍、懇惻之戒，盡心遵行，福自歸身，汝莫憂也。吾雖去世，典籍續存，**六度大法**不持之去，行者得度非神授與。汝等不解吾之所言耶？」

※參見《佛說阿難四事經》卷 1(CBETA, T14, no. 493, p. 757, a9-b1)：

「世有災異，水旱不調，五穀不豐，人民飢饉，不安本土，志欲叛亡；王及臣民，富有倉穀，當惟無常，身命難保，勿愛寶穀，知愛人命，當起悲心，出穀廩假，賙諸窮乏，以濟其命，安居本土。若意慳貪，不欲布施，當諦計念：『人初來生，魂神空來，依因二親情欲之氣，以成己體。在母腹中，十月乃生，得親喜悅，可得全命，愁忿之日，即切絕之，困極乃終，魂神不滅，復更求身。豪貴貧賤，皆由宿行，官爵俸祿，

國土珍寶，無為迷惑，以亂高德，至其壽終，身及珍寶，故留世間，不隨己去，常當慈心練行經道，以佛明教。觀視人物，如幻如化，如夢如響，一切皆空，不可久保，觀世皆爾，此為真諦。世人愚惑，心存顛倒，自欺自誤，猶以金價，買鋤銅也。身死神去，當墮三塗。』諦思如此；急當布施，與身命競，貧窮乞匄，羸老疾病，隨所當與，莫令命絕。執心如此，**十方諸佛，開士大人**，天龍鬼神，無不愍之。至於壽終，魂神所生，輒受豪貴，身意俱安，災害不生，具獲上願，如佛在時，供養佛身，正等無異，此謂二事也。」

2、一、慈心。二、救災恤貧。三、不殺不食肉，施醫藥。四、供食請傳道士。——大乘。

※參見《佛說阿難四事經》卷 1 (CBETA, T14, no. 493, p. 757, b1-c16)：

「國中多有盜賊，水火災異，變生毒氣，流布疾病縱橫，悉是海中龍神鬼王之所為也，故得此毒重病憂惱。此諸鬼神龍者，皆是世人所為，射獵屠殺漁網中毒死者。其魂神或墮海中為龍，或為有力太神化生之類，皆知宿命，忿怒宿怨，因作霧露吐惡毒氣，雨其國中。其時人民，或中毒死者，或但得病者，有相塗污者，皆由世人所作。不仁殘殺物命，展轉相怨；手自殺者，中毒即死；助其喜者，皆更困病；或相塗污，不相塗污者，皆由食肉，有相分者、不相分者。聽聰之士，覺知殺罪迫人不置，以己度彼，正等無異。如此奉行，佛之弘道，行四等心，慈悲喜護，福自歸身。若彼殺家，以肉與己，慎莫食之。不食之者，雖處惡世、盜賊災變、毒氣之時，雖處其中，不相塗染。其帝王人民富有盈穀；孤獨鰥寡，衣食不充，疾病困篤，無以自濟，當給醫藥，糜粥消息，令其得愈，命不橫盡。當明此人宿命行惡，不信三尊，背真向偽，慳貪所致，罪福分明，慎莫為惡；亦當慈心，以佛經法，教訓愚癡，令持經道。若活一人，使病得愈，示之善道，令持五戒，終身清潔，與侍佛身，其福正等，是謂三事也。」

「世有高節，清潔無欲，沙門梵志，懷抱經典，言輒法律。帝王臣民，心當恭肅，詣稟律行。此曹高士，口之所陳，皆是諸佛之遺典也，令人去惡就善，恩倍於親，百有餘分，使人壽終不墮三塗，常當慈心恭肅向之。寧洋銅灌口，利刀截舌，慎莫謗毀此清潔之人；寧自斷手，莫加之痛；寧自剖腹，出心燒之，無怒此人。設使愚者見佛經道，明知去就，由遠頑闇之群，馳就賢者之眾，講受聖典，以成高德。」

「沙門梵志，無以貿買求利為身穢垢，心清行淨，猶明月珠；護持應器，勞身乞食，供口即止。不畜遺餘，或居寺舍，或處山澤樹下塚間，皆知宿命，分別真偽制作經籍，為世橋梁，慈心多愍，坐起咒願，帝王臣民，令國平夷。如此高士，德訓諸天龍鬼惻心，不務世俗故，不為情欲之失所見歎述耳。國王臣民，若有智者，當尋求之，供所當得衣食床臥疾病醫藥，使其安隱，得講經戒，敷演訓導，坐禪念定，或從得道，或死得上天；衣食一國穢濁之人，不如盡心供養清淨道士一人，其福弘大，如佛在時供養佛身，正等無異，此謂四事也。」